

Den clausura di NMFA, musico Simon Gollo a bisa:

“Aruba no ta un happy island so, sino un isla musical tambe”

ORANJESTAD – Despues di 10 dia di actividad musical intensivo na Cas di Cultura, Nuevo Mundo Festival & Academy (NMFA) a clausura cu un anochi di concierto di gala su prome version na Aruba diamars ultimo. Igualmente e director Artistico di NMFA, e violinista Simon Gollo a menciona e ganado di e prome beca “Clyde Harms” cu a keda introduci oficialmente.

E musico Venezolano Suiso, Simon Gollo a lanta e festival 15 aña pasa, ora cu e tabatin apenas 20 aña di edad. E meta tabata pa Maracaibo (Venezuela) bira un centro cultural y musical importante internacionalmente. E prome concierto cu nan a realisa na Maracaibo tabatin un audiencia di 15 persona



pa un orkestra Filharmonico di 80. P'esey ora cu el a mira e cantidad di publico cu a atende nan conciertonan, e

no a basila pa bisa cu e “futuro di e festival den e isla aki ta uno maraviyoso”.



Den su discurso di clausura, sr. Gollo a bisa cu e lo desea di mantene contacto cu e desaroyo musical di Aruba. “Despues di e siman aki Aruba no ta un happy island so, sino un isla musical tambe”. El a bisa cu nos por compara e festival cu a tuma luga na Aruba cu e festivalnan mas grandi rond mundo. Gradicimento y apoyo El a gradici tur instancia y persona cu a sostene nan pa e festival aki por a bira un realidad na Aruba. Di forma masha special el a duna danki na Cas di Cultura y na nan tecniconan kendenan ta traha tras di escenario pa brinda nan e ayudo necesario den cada concierto. E ta spera cu den futuro e “cas aki lo ta den miho condicionnan”.

Tambe el a expresa su palabra di gratitud na Scol di Musica Rufo Wever pa nan ayudo y generosidad. Tur sponsor, famianan y hendenan cu a habri e portanan di nan cas pa ricibi e maestronan y studiantenan di musica. Sr. Gollo di un forma masha conmovi a gradici su casa Susana kende tabata encarga cu e parti organisatorio, tambe el a menciona e nomber di su yiu muhe Victoria, y tambe

su mayornan.

Tambe el a gradici e presencia di un grupo di 60 estudiante di musica di 11 pais cu a atende e convocatorio aki. El a bisa cu entre e grupo aki sigur lo tin strea cu lo briya den futuro.

E musico Simon Gollo a laga sa cu e ta spera cu gobierno di Aruba lo por duna nan apoyo, ya cu e ta sinti cu nan tin cu traha hunto. “Esaki ta un humilde mensahe”, el a bisa. Tambe el a agrega cu su deseo lo ta di traha cu e muchanan di Aruba, y forma parti di nos cultura, pero pa logra esaki mester di mas comunicacion. □

